

Uunga allannguutissatut

siunnersuut

Siunnersuut: Avatangiisit innarlitsaalioneqarnissaat pillugu Inatsisartutinatsisaat nr. xx, xx. 2011-meersoq.

Pingajussaarinninnissamut Naalakkersuisunit saqqummiunneqartoq.

§ 29-mut

1. § 29, *imm. 1*, imatut oqaasertalerneqassaaq:

”*Imm. 1.* Inuiaqatigiinni pissutsit pingaarutillit pisariaqartippassuk Naalakkersuisutqaqutiguinnaq § 28, *imm. 2*-mi inerteqquteqarnermiit immikkut akuersissuteqarsinnaapput.”

§ 36-mut

2. § 36-ip kingorna nutaatut *imm. 1* ikkunneqassaaq:

”*Imm. 2.* Kommunalbestyrelsiimm. 1-imi aalajangiineq taaneqartoq aalajangiiffigineqareerpat eqqakkatut isigineqartunik passussinermi igitsinermilu aningaasartuutit matussutissaqartinniarlugit tamakku tuniniarsinnaavai akitsorterussilluniluunniit.”

Tamatumakingorna *imm. 2-4 imm. 3-5*-nngorput

§ 49-mut

3. § 49 *imm. 4* imatut oqaasertalerneqassaaq:

”*Imm. 4.* Kommunalbestyrelsimik isumaqatiginninniareerlutik Naalakkersuisut suliffeqarfinnik immikkut ittunik nakkutilliineq kommunalbestyrelsinut isumagisassanngortissinnaavaat. Nakkutilliinermi suliassat, Inatsisartut inatsisaat manna malillugu imaluunniit inatsisip matuma kingunerisaanik maleruagassaliat malillugit kommunalbestyrelsimit isumagineqartussat, kommunalbestyrelsimik isumaqatiginninniareernikkut, Naalakkersuisunut isumagisannngortinneqassanersut Naalakkersuisunit maleruagassalioneqarsinnaavoq.”

Allannguutissatut siunnersuummut nassuiaatit

Nassuiaatit nalinginnaasut

Sanaartornermut Avatangiisinullu Ataatsimiititaliap inatsisissatut siunnersuummut isumaliutissiissutaanut atatillugu aatsaat pissutsit immikkut illuinnartunik pineqarpat § 29 imm. 1 annertunerusumik atorneqartassasoq, imeqarfiup killeqarfiata iluani sulianut immikkut akuersisoqartarsinnaasoq ataatsimiititaliaq isumaqarpoq.

Inuit ajoqusernissaat pinaveersaartinniarlugu immikkut akuersisoqarnissaanut periarfissaqartariaqartoq ataatsimiititaliamit kissaatigineqanngilaq, taamaallaalli inuiaqatigiinni pissutsit immikkut illuinnartut pissutaappata.

§ 29, imm. 1-imi allannguut aallaqqaammut siunnersuummut naleqqiullugu aningaasaqarnikkut kinguneqartitsissanngitsoq nalilerneqarpoq.

Sanaartornermut Avatangiisinullu Ataatsimiititaliap inatsisissatut siunnersuummut isumaliutissiissutaanut atatillugu inassutigaat inatsisissatut siunnersuutip pingajussaaneerneqartinnagu § 36-mut allannguutissatut siunnersuummik Naalackersuisut saqqummiussissasut, passussinermi igitsinermilu aningaasartuutit matussutissaqartinniarlugit tamakku annertunerusut tuniniarnissaannut akitsorterunnissaannulluunniit kommunit periarfissinneqarlutik. Tamakku eqqakkatut isigineqartut passunnerini iginneqarnerilu aningaasartuutit ilaannut kommunit taamaalillutik matussutissaqartilerlugit.

Allannguutissatut siunnersuut Kalaallit Nunaanni Politimesterimik oqaloqatigiissutigineqarsimavoq. Oqaloqatigiinnerit taakku tunuliaqutaralugit Kalaallit Nunaanni Politimesteri nalunaarpoq allannguutissatut siunnersuut nassaat pillugit maleruagassanut akerliussanngitsoq.

Aalajangersagaq nutaaq aningaasaqarnikkut kinguneqassanngitsoq nalilerneqarpoq.

Allannguutissatut siunnersuut nr. 3-mut pissutaavoq inatsisissatut siunnersuummi § 49, imm. 4-mut qallunaatut kalaallisullu oqaasertaasa imminnut naapertuutinnginneri, immikkoortumi tassani kalaallisut oqaasertaani oqaaseqatigiit mininneqarsimammata.

§ 49, imm. 4-mi allannguut allaffissornikkut aningaasaqarnikkullu kinguneqartitsissanngilaq. Aalajangersagaq nutaajunngilaq, avatangiisit innarlitsaaliorneqarnissaat pillugit Inatsisartut peqqussutaata allanngortinneqarnissaa pillugu Inatsisartut peqqussutaat nr. 7, 13. maj 1993-meersoq akuerineqarmalli atuussimalluni.

Allannguutissatut siunnersuummi aalajangersakkanut ataasiakkaanut nassuiaatit

Nr. 1-imut

Soorlu siunnersuummi § 29, imm. 1-imit takuneqarsinnaasoq inuiaqatigiinni pissutsit immikkut illuinnartut pissutigalugit § 28, imm. 2-mi inerteqqummiit Naalakkersuisut qaqutigoortumik immikkut akuersissuteqarsinnaapput. Naatsorsuutigineqarpoq aalajangersagaq taanna pisuni immikkut illuinnartuni taamaallaat atorneqartassasoq.

§ 33-mut atatillugu immikkut akuersisoqarnissaanut sulianut atatillugu kommunalbestyrelsi, Nunatta Nakorsaaneqarfia aamma Namminersorlutik Oqartussat Uumasut Nakorsaqaarfianut tusarniaasoqassaaq. Suliami aalajangersimasumi peqqissutsikkut suliaqartunit Naalakkersuisut naliliisitsinissaat ilaatigut eqqarsaatigalugu taamaaliortoqassaaq. Kommunalbestyrelsip tusarniarneqarnera ilaatigut pissaaq immikkoortumik kommunip ilaatigut nakkutilliinermi oqartussaanera pissutigalugu.

Avatangiisit pillugit peqqussut atuuttoq malillugu ”inuiaqatigiinni pissutsit illuinnartut pisariaqartippassuk” nunap assersukkap iluani ingerlataqarnissaq pillugu inerteqqummiit immikkut akuersisoqarsinnaavoq. Siunnersuummi § 29, imm. 1-imi erseqqissarneqarpoq qaqugu immikkut akuersisoqarsinnaasoq, tassa inuiaqatigiinni pissutsit immikkut pingaarutillit pisariaqartippassuk qaqutiguinnaq akuersisoqarsinnaasoq.

Nunamut assersukkamut immikkut akuersinerit ukiunit tamani killeqartumik aqunneqarsimapput nalinginnaasumilli imermik pilersuinermut sanaartukkanut taamaallaat immikkut akuersisoqartarluni, aamma imermik pilersuinerup pitsanngorsarnissaanut imaluunniit ingerlatiinnarnissaanut.

1962-mili nunamut assersorneqartumut killiliussamiit imermik pilersuinermut tunngasuunngitsunik ikitsuinnarnik immikkut akuersisoqarsimavoq. Immikkut akuersinerit taaku inuiaqatigiinni pissutsit immikkut illuinnartut eqqarsaatigalugit tunniunneqarsimapput, assersuutigalugu nuna assersorneqarsimasoq aqqusaarlugu illoqarfiit tikillugit erngup nukianiit nukissiorfimmii innaallagissap aqquataasa pilersinnerinut ataavartussanik ikkussuinerlut.

Tamatununga tunngavilersuutaasoq tassaavoq innaallagissap aqquataasa pilersinneqareerpata piffimmiit imissamik pissarsiffigineqartussamiit annertunerusumik artukkiisoqassanngitsoq Naalakkersuisut naliliisimammata, tassa sanaartukkat ukiut 50-it sinnerlugit atasinnaammata, qaqutigoortumillu aserfallatsaaliuilluni imaluunniit iluarsaassilluni suliaqarnissaq imaluunniit kabilinik nakkutilliinissaq taamaallaat pisariaqarsinnaammata.

Imermut pitsanngorsaataasunut suliniutinik allaanerusunut allanik tunngavilersuuteqarluni ataasiakkaatigut allanik immikkut akuersisoqartarsimavoq, tassunga ilanngullugu qimussit illerngisa pitsaanerulersinnissaannut illinilersuinermit maskiinat ingerlanissaannut Qaasuitsup

Kommuniani immikkut akuersisimaneq. Siunnersuummi matumani taamaallaat naatsorsuutigineqarsinnaavoq imermut pitsaaningortitsiniarnermi suliniuteqartoqassappat, imaluunniit inuiaqatigiinni pissutsit immikkut pingaaruteqarpata, soorlu pilersuinermi innaallagissap aqputaanik ikkussuinerit assigisaalu pineqarpata immikkut akuersisoqartassasoq. Inatsisip akuerineqarnerata kingorna qulaani taaneqartutut Qaasuitsup Kommunianut immikkut akuersisimanerup assinganik akuersisoqarnissaa taamaattumik naatsorsuutigineqanngilaq.

Immikkut akuersisoqarneranut atatillugu arlalinnik piumasqaateqartoqartarpoq, tassunga ilanngullugu imissamik pissarsiffissap mingutsinneqarsinnaaneranut annikillisaasumik upalungaarsimanissamut pilersaaruteqarnissaq pillugu piumasqaat.

Naak motorinik ingerlatinneqartumik assartuutinik / sakkunik ingerlassinermut atatillugu mingutsitsinerup pinngitsoortinnissaanut upalungaarsimanissaq qulakkeerneqaraluartoq, ingerlataqarneq annertusivoq taamaalillunilu uulianik mingutsitsisoqarsinnaanera. Imeqarfiit allilerneqarneri soorlu benzinamik / uuliakoormik mingutsitsisoqarnerani imissamiksaliisinnaangorlugit tamanna nunatta karsianut aningaasaqarnikkut annertuunik kinguneqartitsisussaassaaq.

Immikkut akuersinermut atatillugu mingutsitsineq pinngitsoortinniarlugu imm. 2-mi aalajangersarneqarpoq imm. 1 malillugu immikkut akuersinerit qaqugukkulluunniit allanngortinneqarsinnaasut imaluunniit utertinneqarsinnaasut, Naalakkersuisut naliliineri naapertorlugit imissamik pissarsiffissap mingutsinneqarnissaa aarlerinarsippat.

Nr. 2-mut

Eqqakkatut isigineqartunik passussinermi igitsinermilu aningaasartuutit ilaannut kommunip matusinissaanut atatillugu eqqakkat tuniarneqarnissaat imaluunniit akitsorterunneqarnissaat kommunimit toqqarneqarsinnaavoq. Tamatumunnga atatillugu eqqakkat nassaat pillugit maleruagasanut ilaannginnerat kommunimit qulakkeerneqassaaq.

Nr. 3-mut

Kommunalbestyrelsimik isumaqatiginninniareerlutik Naalakkersuisut suliffeqarfinnik immikkut ittunik nakkutilliineq kommunalbestyrelsinut isumagisassanngortissinnaavaat. Nakkutilliinermi suliassat, Inatsisartut inatsisaat manna malillugu imaluunniit inatsisip matuma kingunerisaanik maleruagassaliat malillugit kommunalbestyrelsimi isumagineqartussat, kommunalbestyrelsimik isumaqatiginninniareernikkut, Naalakkersuisunut isumagisassanngortinneqassanersut Naalakkersuisunit maleruagassaliorneqarsinnaavoq.

Isumaqatigiinniartussaanerup kingunerisaanik nakkutilliinermi suliassap Naalakkersuisunut imaluunniit Naalakkersuisuniit nuunneqarnera kommunalbestyrelsip isumaqatigissavaa. Tunniussinerup aningaasaqarnikkut kingunissai pillugit isumaqatigiinnissaq anguneqarsinnaasimanngippat, tamanna pillugu isumaqatigiinniarnarit kommunik ataatsimoortumik tapiissutinik isumaqatigiinniarnernut siullernut kinguartinneqarsinnaapput.

Nakkutilliinerup tunniunneqarneranut atatillugu ikaarsaarnermi apeqqummut isummertoqassaaq, pingaartumik nakkutilliinermi suliat ingerlasut qanoq naammassillugit suliarineqassanersut.

Isumaqatigiinniarnarit aallartinneqarnissaannut Naalakkersuisut aamma kommunit suliniuteqarnissamut pisussaaffeqarput.